



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICO-CHIRURGICA,

QUOD LIBETARIIS DISPUTATIONIBUS,
*manè discutienda in Scholis Medicorum, die Jovis secundo mensis
Aprilis, Anno Domini M. DCC. L.*

M. ANTONIO-NICOLAO GUENAULT,
Doctore Medico, Præsede.

An Leucophlegmatia, leves Scarificationes?

I.



ACHINAM humanam format unicum vas multifidum, quod;
ut diametro, sic & nomine varium. Per ejus ramos, licet sub
finem stupendæ tenuitatis, varii generis fluida, perenni motu
aguntur, tenuantur, secernuntur. Magna enascens è corde
arteria, innumeros spargens furculos, ad omnes corporis par-
tes sanguinem pellendo vehit, quem excipiunt duplicis spe-
ciei vasa; venæ, scilicet, sanguinæ, & arteriæ lymphaticæ. Has longè nu-
A

merosiores ; promissiores , minores ; subit lymphæ , five alba cruoris portio ; denegato rubris ipsius globulis , utpotè crassioribus , aditu ; qui quidem globuli , urgente cordis & arteriarum systole , venarum radices immediatè inire coguntur , cor iterùm petituri. Lymphæ verò arterias suas emensa , sepositis diversis secernendis succis , à venis lymphaticis hauritur , ad cor itidem devehenda. Si quæ autem pars , maximè corporis ambitus lymphaticis vasis scaetet. Cutem intrà , & adiposi corporis cellulas , mirabile horumce tubulorum rete spatatur , quod oculis jucundè manifestant injectiones. Quò facilior foret & citior revehendi cruoris ad commune principium regressus , opus erat ipsi duplici viâ , quam suppeditant venæ sanguinæ & lymphaticæ , ne sanguinis circuitus tardaretur , sed fluxûs in arteriis celeritas , mediantibus utriusque generis venis , compensaretur. Dùm liberè fit ille liquidorum circuitus , viget sanitas. Ex illorum inordinatione , nascitur morbus ; & sicut à cruoris stasi , phlogoses , morbi acuti , phlegmone , erysipelas , ac cæteri tumores inflammatorii ; sic & ab impedito lymphæ cursu , hydrops , œdema , leucophlegmatia. Tumet in hâc partium , præsertim inferiorum , universa cutis , albet , emollitur , laxatur ; prementis digiti vestigium retinet. Sensim corrumpitur subsistens liquidum , & funesta minatur symptomata , nisi maturè tollatur continens morbi causa.

I I.

QUEM AD MODUM cacochymia ; cachexia ; sic cachexia leucophlegmatia plerumque soboles ; cujus causa proxima , stagnans lymphæ , à sanguinis morâ , vel conglobatarum glandularum obstructione , oriunda. Progredienti verò sanguini moras neçunt ipsius spissitudo , aquea diathesis , paucitas , vasorum ejus compressio , vel tandem à morbo atonia superstes. Æquo spissior sanguis , systalticam cordis & arteriarum vim recusans , seigniter vibratur ; tardi-gradus eructat lympham , tegumenta inundantem. Parem lymphæ exundationem & stagnationem ab aqueâ sanguinis diathesi , fibras laxante , expectes. Nec mirum si post hæmorrhagias aliasque immodicas evacuationes , imminutâ sanguinis mole , deficiente sufficienti succi nervosi secretionem , languentibus proindè solidis , cruor inertius propulsus , suum deponat aqueum laticem , adiposum corpus jam laxum & à corde distitum , irrigaturum. Similis contingit effusio lymphæ , à vasorum sanguineorum compressione , ligaturâ. Compressis ab utero iliacis gravidarum venis , nascitur crurum œdema ; à venâ , vel membro ligato , tumor œdematosus. Haud quoque rara ab effœtis à morbo viribus , leucophlegmatia ; etenim sub atoniâ corporis , fibrarum elaterem remitti ; vasorum parietes confidere ; fluida deside procedere passu ; stomachum lassari ; alimentorum solutionem depravari ; chylum malè subactum sanguini suppeditari , quid frequentius obvium ? Nùm hâc positâ virium defectione , laxatæ tegumentorum cellula torpentibus aquis madeant , necessum habent ? Hinc è morbo recreatis , pedum , crurum , manuum , imò & vultûs œdematosus tumor familiarissimus. Eundem tumorem à conglobatarum glandularum obstructione observare est : in his enim organicis partibus impactus obex , præpeditâ lymphæ transmissione , ipsius restagnationi præbet ansam. Quot & quanta ex his me-

moratis causis futura mala ! Diuturniori morâ acrior & vitiosior facta lymphâ, teneros vasorum suorum parietes sensim laxando, comminuendo, laniando, effunditur. Hinc hydatides, abscessus serosi, ulcera cacoethea, gangræna, tandem mors. Ociùs igitur vacuandæ sunt hebetes aquæ, ne corruptelam concipiant.

I I. I.

RESTAGNANTEM in leucophlegmatiâ lympham non unica eliciendi via. Patet frequentior per diuresin & catharsin. Nonnunquam per hydrosin, effusa carcere, sibi pandit iter. Idcirco in spissâ sanguinis diathesi & glandularum infarctu, aperientia, diuretica, hydragoga, mochlica, hydrotica exhiberi, vaporisque balnea & hypocausta adhiberi solent; his siquidem remediis lenta tenuantur fluida, referantur glandularum ergastula, per renes faciliùs & copiosius secernitur serum; contrectatæ à catharticis intestinorum glandulæ, lympham fusiùs effundunt. Sic hauriuntur exundantes aquæ. Verùm quantâ morâ, quantis ægrotantium cruciatibus, quantâ totius corporis macie, dubium illud beneficium obtingat, plura testantur exempla! Imò subit metus ne, eliminatâ à solo cruore lymphâ, magis ac magis inspissetur sanguinea moles, consuetum ideò circuitum tardiùs absolutura; dùm interim madet corporis peripheria. Quid est ergò cur hisce remediis diutiùs institeris? Cùm faciliora, expeditiora & minùs tædiosa præstò sint alia auxilia; leves intellige Scarificationes, quibus cautè adhibitis, brevè cedit aqua intercus.

I V.

QUO prosperè succedant Scarificationes, hæc potissimùm observanda veniunt. 1°. Intacti remaneant muscoli, ita ut mali sedes ferro tantùm attingatur. Secùs madidiora subirent ulcera curatu difficiliora. Cutem igitur ad corpus adiposum usque lanceolâ scindere, & in quâque crurum internâ ac externâ, femorumve anteriori parte, duas tresve Scarificationes, quatuor transversos circiter digitos longas, instituere sufficit. Totius corporis ambitus redundans humor, datâ hâc eluvie, stillando profluat ex omnibus adiposis cellulis, utpotè sibi invicem communicantibus. 2°. Tempestivè fiant incisiones. Erraret qui ferius ad hoc confugeret præsidium. Diutiùs in corpore resistans vel tenuissimum liquidum, acorem ducit; fibrosum flaccescit tegumentorum madidius textile; nervorum extrema spirituoso ac vitali succo orbantur; vulnerata cutis, udior, cicatrici repugnans, manante corripitur ulcere, sæpissimè sphacelo. Priusquàm ergò hæc inusta fuerit labes, & simul ac cæterorum remediorum vim eluserit morbus, minimè protelari, quin imò ipsis sociari amant Scarificationes. 3°. Nulla sit in visceribus inveterata obstructio, nullus immedicabilis scirrhus, nullum ulcus, nec scorbutus, syphilis, scrophulæ. Haud ab atoniâ, inediâ, hæmorrhagiâ, vel sub diuturniori ægritudine fatiscat æger. Sic conflictatus, Scarificationibus paulùm juvari, non verò sanari potest. 4°. Peractâ operatione, splenia aquâ - vitæ camphoratâ, vel aliâ congruenti madida, fibrarum tonum instaurandi causâ, vulnusculis admoveantur. Effuso latice, citò coalescent.

QUID in leucoplegmatiâ fausti sperandum à levibus Scarificationibus, neminem intento rem animo perpendentem fugit. Laxatæ adiposarum cellularum fibræ, exuberantibus undis liberatæ, pristinum elaterem, sese contrahendo, recuperare valent. Vasa omnia amissum tonum resumunt. Instaurantur systaltici motus. Liquida validiùs urgentur. Secretiones & cæteræ functiones redintegrantur. Sic detumescit & firmatur cutis. Id boni contigisse, plus vice simplici observavimus. Si quâ arte, hâc potissimum Chirurgiâ ægros sanitati reddendos certum est. Alia nihilominus haud improbamus medicamenta, quæ, quò Natura vergit magis, sive diuresi, sive catharsi, vel diaphoresi, serosam colluviem eliminandi virtute pollent. Auxiliatrices manus sibi mutuò præstant Pharmacia & Chirurgia. Hæc tamen tutior est, citior & jucundior. Ex ipsâmet affectâ parte immoratum effundit liquidum, quod nonnisi per longos, & sæpiùs impeditos tramites, medicamentorum vel efficacissimis viribus, secretoria peteret. At iterùm monere juvat sedulò cavendum, ne jam flaccidæ partes ac depauperatæ scarificentur; si eas gangrænæ minùs obnoxias fore, velis. Nec altiùs adacto ferro faucientur muscoli, quos à putridis ulceribus arceri satagis. Hæc neutiquàm timenda veniunt, modò ægrotantibus adhuc consent vires, & ii deploratâ symptomatum sævitatè nondùm crucientur, nusquamve corpus adiposum ultrà pervadant sectiones.

Ergò Leucophlegmatia, leves Scarificationes.

DOMINI DOCTORES DISPUTATURI.

<i>M. Franciscus Bidault.</i>	<i>M. Josephus Lallemant.</i>	<i>M. Ludovicus - Maria Pouffe, Censor Regius.</i>
<i>M. Joannes-Claudius Munnier, Consiliarius Medicus Regis ordinaris & Domus Regiæ Invalidorum.</i>	<i>M. Petrus Poissonnier, Professor & Censor Regius.</i>	<i>M. Antonius Casamajor, Censor Regius.</i>
<i>M. Ludovicus - Renatus Marteau.</i>	<i>M. Antonius le Camus.</i>	<i>M. Raymundus de la Riviere.</i>

Proponebat Parisiis, JOANNES MAC-MAHON, Laonensis in Hiberniâ, Doctor Medicus Remensis, ultimo sæviente Bello, Medicus Exercituum Regis ad Rhenum, Neo-Bri-faci in Nosocomio Regio Medicus Ordinarius, necnon Saluberrimæ Facultatis Medicinæ Parisiensis Baccalaureus, A. R. S. H. 1750, à sextâ ad meridiem.

Typis QUILLAU, Universitatis & Facultatis Medicinæ Typographi, 1750.